

Manfred Zirkelbach

MaZI-Ned auszudenke

Schuelofang

Heüt marschieren se widdr, onnere sechsjährliche Sprössling zum erschde Moal nei die Schuel, wubei die Herzlich vo däre Kinner bis nauf no en Haals schlooche für lauderAufrechung. Mid Bücher on weiß dr Himml wie viel Hefter schleift dann middochs dr Rucksook bis no off en Bode, wann se widdr hemmkomme.

Bei so enner Gelecheheid denk ich ömmr widdr dro, wie des wor für eenesachzig Jahr im August 1950, wie ich mid men Ranze on e Schiefertofel, do dro ogebonne e noss Schwämmle on e trockener Labbe, do derzu e hölzer Schöchtele mid zwee Griffel stolz nei die Schuel marschierd bin. Nee, e Schueltüte hadd dommoals ned gawe, die hadd erschd e poor Dooch speäter dr Fotograf Engelhard vo Böschm mitgebrochd. Die is dann beim Schuelbild vo enn zum annere weddr gelangd worn, on die Fraa vo dem Fotograf hadd erschd jedem Jonge den Lenksscheidl gekämmd on däre Mädlich die Zöpf oständich zommgebonne.

Gelernd hömm mer aach. „Schönschreiben“ hadd sich des genennd, als erschdes die Martsteckelich (Spazierstöcke) Schleife nauf on Striich noo, odr römmdgedreäd, Martsteckelich mid Striich vo owe roo on Schleife widdr noch rachts nauf. Ich grich heüt noch Gänshaut, wann ich o des Griffelgekratz off däre Schiefrhoofl denk.

Es schönst o onnere Schuelzeit worn dann ower ömmr widdr die groesse Pause. Mädlich on Buwe worn fein säüberlich getrennt off en Hof, e Wassergröwele zwösche Kerrich on Schuelhaus wor die Grenz, üwerwachd vom Lehrer Hucho mid es Hoselnössteckele. Die grüsse Jonge hömm hinner die Kerrichsmauer (Kirchenmauer) Fußball mid en aägestopfte Lompeball, die Klenne hömm vorne dro „Wer fürchtet sich vorm schwarzen Mann“ gspilld. Domals hömm mir jo noch felsenfest dro gelebbed, dass die schwarze Amisaldode (amerikanische Soldaten) alle Menschefresser sinn. On die Mädlich? Die hömm scho in ihr Schuelzeit gern Braut gspilld: „Petersiliensuppenkraut, wächst in unserm Garten, Fräulein Gertrud ist die Braut, kann nicht länger warten“. No ja, knapp fuchzeh Joahr speär honn ich se dann aach schließlich geheiert.

Enns wor in onnere Schuelzeit ganz wichdich. Gesonge worn is orich vill, aüs dem Büchle mid dem grünne Pappdeckldeckl (Einband) „Sing mit“. E Liedle hoo ich mir bis heüt als Lebensweisheit bewohrt, e fast philosophischer Text: „Ist ein Mann in Brunn` gefallen, hab ihn hören plumpsen. Wär er nicht hinein gefallen, wär er nicht ertrunken“.

Ned auszudenke